

Estd. 1983

Reg. No. 386 (MZ)



MARYMA

Ramhlun North YMA Chanchinbu

“YMA thuvawn: YMA chu tanpui ngaite tanpuitu a ni”



YMA thiltum: 1. Hun awl hman that. 2. Zo fate hma sawnna ngaihtuah. 3. Kristian nun dan tha ngaih san

Vol. 43	Issue No. 16	Ramhlun North: Ni 19 April, 2025
 BRANCH THU THAR ■ YMA Committee Room hmangtu ten kan hmun hma felfai taka kalsan thin turin kan inngen nawn leh e. ■ YMA Day June ni 15 hi Pathianni a ni avangin a hma ni ni 14 ah lawmna neih ni se tih a ni a, Organising Committee hetiang hian din a ni. Chairman - Pu Biakchungnunga, Secretary ViceChairman- Pu R. Lalrinmawia, ECM Secretary - Pu Isaac Zothianghlima, ECM Asst. Secretary- Pu KC Lalramluahpuia, ECM Member-te: Section Leader te, NI. V. Lalruatkimi, ECM leh NI. Elizabeth Lalnuntluangi, ECM te ruat a ni ni. ■ May ni 2, 2025-ah BECM bakah Section hrang hrang Committee Member te pualin intuaitharna hun hman tum a ni a, a hmun atan Sunrise Villa hman kan tum chu Villa neitu, Pu R. Lalrinmawia, ECM, te chhungkuain a thlawnin min hman tir dawn a, lawmawm kan ti hle. Hetiang hi hun hman dan tur a ni Hruaitu: Pu Lalrochama, Vice President Hunserh: NI. Elizabeth Lalnuntluangi, ECM Special Item : 1. Section tin atangin pakhat theuh bakah 2. Secretary-te hnen atangin item hlimawm lam beisei a ni bawk. Thusawi: Pu Laldinglana Sailo, President Music & Sound: Music Sub Committee Programme hi zan dar 6:30-ah tan tur a ni a, a kal thei lo turte chuan ziakin phatna Branch Secretary hnenah thlen tur a ni . Programme-ah hian a duh apiang tan thusawina hun hawn a ni ang. ■ Local Council te hnen atangin Inverter set kan dawng a, YMA Committee Room-ah fit nghal a ni. An chungah lawmthu kan sawi e.	EASTER SUNDAY (Vengchhung kohhran ten urhsun takin hmang dawn) Ramhlun North, the 19th April, 2025: Naktuk Pathianni hi Easter Sunday a nih angin vengchhunga kohhran hrang hrangte chuan urhsun taka hman tumin an inbuatsaih a, kohhran hrang hrangte hman dan tur hetiang hi a ni- THE SALVATION ARMY: Good Friday atanga Easter Sunday thleng Crusade hmang a, Speaker-ah Maj. Jerry Lalrozama, C.O leh Pu H. Laltleipuia te an ni. Easter Eve zanah SAY ten tlaivarin Biak Inah hun hmang ang a, zing dar 3 ah Ramhlun Corps Band nen Thawhlehna Hriatpuina Kawngzawh a ni anga heng hmunah te hian hun hman a ni ang - Biak In kawt, D.I.E.T Peng, Govt. Hrangchhuana High Sschool thlang, P.W.D. Tlang, LRM Hospital bul, Zudio Kawt, Chanmari, Industry Peng, Tlaklui kam leh RSC Field. PRESBYTERIAN, RAMHLUN NORTH: Pathianni zing dar 5:00 atangin Biak Inah Sunrise Service, KṲP bultum in hman a ni ang a, chawhma, chawhnu leh zan lamah te Synod lam atanga thupui thlan sa hmangin kohhran inkhawm kalpui a ni ang. Pathianni chawhma inkhawm banah hian thawhlehna thingpui ruai kilho a ni bawk ang. Chawhnu inkhawm banah lengkhawm a awm dawn bawk a ni. Tin, Kohhran Pavalai Pawl te Damparengpui Pastor bialah Good Friday leh Easter Sunday hmanpuiin an zin a, member 40 chuang an thawkchhuak a ni. BAPTIST CHURCH OF MIZORAM: Easter Sunday hian zing tanngtai inkhawm banah ṲKP ten tanngtai inkhawma kalte tan leh Nazareth Hospital, Ramhlun North a dam lo leh thawktute hnenah artui chhum, cake leh thingpui an sem ang. Kohhran inkhawm hi dar 10:30 ah tan a ni ang a, zing inkhawmah hian Upa Dr. Lalzirmawia Chhangte a sermon ang. Inkhawmnaah hian KNP (Kristian Naupang Pawl) in hla an rem ang. Dan pangngaiin zing inkhawm ban hian Sunday School in a zawm ang a. Sunday School banah Kohhran pum huap zaikhawm buatsaih a ni anga, ṲKP ten an hruai ang. Zan lam Sermon inkhawmah Rev. James Zoramawia, Asst. Professor, AICS in thu a sawi ang a, kohhran zaipawl in hla an rem ang. ST. THOMAS CHURCH: Zanin atangin Easter Vigil hman tan a ni ang, Easter Sunday chhun dar 12:00-ah High Mass a awm anga, Main Celebrant Rev. Fr. James Zodinlana, Parish Priest Ramhlun, Easter Proclamation - Kohhran zaipawl. Inkhawm banah easter egg leh thingpui ruai kilho a ni ang. PRESBYTERIAN, RAMHLUN EAST: Pathianni zing dar 5:00 atangin Biak Inah Sunrise Service, KṲP bultum in hman a ni ang a, chawhma, chawhnu leh zan lamah te Synod lam atanga thupui thlan sa hmangin kohhran inkhawm hun hman a ni ang. Pathianni chawhma inkhawm banah hian thawhlehna thingpui ruai kilho a ni bawk ang. BRANCH EXECUTIVE MEETING VAWI 4-NA Ni 15.04.2025 zan khan YMA Committee Room-ah Ramhlun North Branch YMA Exective Committee Meeting vawi 4-na that a ni a, thurel thenkhat te hetiang hi a ni. 1. Thanmual Sub-Committee hmalakna a lungrem chu zawh thawkhat tawh a ni a, rem belh ngai la awm te rem belh rem tih a ni. 2. Library Sub-Committee ten tui filter thar an nei a, Tin, Library hi thla thar May atanga mitpuite hman theih turin an ruahman a, Membership fee hi chhungkaw khatah Rs. 100 a ni ang. 3. YMA member zawn zawh tawh a ni a, member 4752 kan ni a, life member 95 kan awm bawk. 4. Chhiatni Fund khawn zawh thawkhat a ni a, tuna lut chin chu Rs. 16,98,397/- a ni. 5. Section tinin mahni huam chhungah raltlan an awm leh awm loh lo en fel se, raltlan survey hi April thla chhunga tih fel tur a ni ang. 6. May ni 2, 2025 hian Branch leh Section hruaitute intuaitharna hun Sunrise Villa ah hman tum a ni. 7. Kumpuan Sub Committee Secretary hnen atangin veng chhung kohhran hrang hrang a tleirawl inkhawmah hun hman an duh thu an rawn thlen chu Secretary ten kohhran hrang hranga dilna lo siam se kan ti. 8. YMA Day hi June ni 14 (Inrinni)-ah hman ni se kan ti a. 9. Central YMA atanga PMAY in sak tanpui dilna enfiah chungchang kan dawng a, hei hi kan vengah neih tawh niin, Branch aiawhin Pu VL Pianruala, ECM a tel. 10. Section sum vawn dan training neih tha kan ti a, May ni 1, 2025, zanah neih ni se kan ti a, training pe turin Pu Vanlalrova, ECM, Pu Lalneihhlua, ECM leh Pu C. Lalremruatfela, ECM te ruat an ni.	



YMA

Chanchin tha zara kan neih, pawl ropui tak YMA zofate tan chuan a aia ropui pawl dang a awm leh theih pawh a rinawm tawh lo. Zosapten kan zoze mil a an lo din a ni a, tlawmngaihna nen thuk takin a inzawm a. Kan Kristianna nen pawh phei khai rual takin an kal dun thei bawh. Zofate hmasawna ngaihtuah chung zelin tanpui ngaite a thlahthlam ngai lo.

Hnamdangte hian hetiang pawl hi nei ve tak ang i maw? Khawiah mah an awm a rinawm loh. Lo awm ve pawh nise an chhuang ve viau ngei ang.

Pawl tam tak hi chuan an member-te tan an inserh deuh thin a, YMA erawh chuan a mamawhtu apiang a pui mai thin. Mizo e, zo love a ngaihtuah lova a mamawhtu mamawhna zawnah a che mai thin.

YMA hi awm lo ta se, kan zozia tam tak hi kan chhawm nung zo kher lovang. Thlangkawr vai te tihdan emaw kan thenawm mite zia tam tak hi chu kan chawlut tawh ngei ang.

Chuti khawpa pawl ropui chuan hming hliauna leh sawisel pawh a tawh ve reng bawh a. Hruaituten thil tih sual vangte leh member-te tih sual vang pawh a ni ang. Mihring chu thil tisual thin, thil tisual nawn fo thin kan ni tih hria ila. Sawisel mai lova thurawn kan inpek thin zawk a tha em em a ni. Pawl hming ang zawnga kan sawisel phei chuan a pawl leh zual a ni.

He pawl hian zofa chanhaite engzat nge a chhawmdawl tawh a, engzat nge ala chhawmdawl dawn? tih ngaihtuah ila. Nang ngei pawhin ila mamawh ve dawn a ni. Tun atang kum tamtak thleng chuan he pawl hi midangte tan a la luangchhuak reng dawn.

He pawl hlut zia hi hrechhuak thar ila, ngaihlu turin naupang zawk te pawh i zirtir zel ang u. YMA vul zel rawh se.



VANGCHHE KHAW HMUN HLUI

He lai hmuh hi Vangchhe ho hian khaw hmun hlui an ti mai a. A hmun hma vel han en hian hmanlai in tute emaw chu an lo cheng ngei tawh niin a hriat a ni. He lai hmun a mâk em em na chu, an inhmun hlui niáwma a lan dan aâng hian an in sak dan hi Mizo in sak dan ang lo taka sak a nih duh hmel hle a. Heng lai hmuna an in sakna bawh ni-a langah hi chuan lung an rem zawl a; kan Mizo in sak dana a kang ânga sa lovin lei chhuat ring in an sa a nih duh hmel hle.

Tin, chu bakah, he lai 'Khaw hmun hlui' an tih hi a zâu hle mai a. Khaw lian tak a ni ngei ang tih pawh a hriat theih. Khaw hmun hlui ah hian tun hma in tu te nge lo chheng ang tih pawh hi ngaihtuah tham tak a ni. A hmun hma chik taka han en hian kan pi leh pute chenna a lo ni reng em tih ah pawh ngaih dan tam tak piang chhuak thei a ni a.

Tun hnua ngaih dan lo piang chhuak Mizoram hi lo luah hmasatu an awm em ni tih ngaih dan nena hmeh bel theih tur takin heng lai hmun hma vel hi a danglam hle a ni. "He lai khaw hmun hlui an tih ah hian thil mak tak mai a awm a. An in hmun hlui bul maia pial tlep zau tak chu inhnaih tak takin an kêr kua a. Chung thil kâw bul zelah chuan awmze nei takin thuk lo te-in tui luanna tur niáwma tak inpawh thei vek in an kêr bawh a. He pial tlep-a awmze nei taka an thil siam hi eng atana siam nge a nih tih chiang taka sawi fak thei an awm lo. Heng lai Vangchhia vel a thil hlui en dik tura phai lam aâng lo kal mi pakhat chuan tui luang hmanga an rimawi (music) siamna (water pavillion) a ni e, a ti. Han en mai chuan a nih duh hmel viau. Mahse, heta zawhna awm thei ta chu, Water Pavillion an tih hi tui hmanga rimawi siamna ni se la chuan tun hnu thleng pawh-a rimawi chu la insiam reng âwm tak a nih laiin, tuna

Vangchhe khua leh tui te khi chuan ruah a han sur nikhua te pawh hian eng ri danglam mah a insiam ngai lo an ti.

Hman deuh ah khan Vangchhe khua-a khaw hmun hlui an tih bawh hi mithiamte'n an zir chiang mek a. Tun hma in khua an lo din tawh thin a nih ngai chuan chu khua an din chu eng tiang taka upa nge a nih tawh ang tih hriat nan Carbon Dating lam an buaipui a. Mi thiam tak tak te zarah thu thar kan hriat thuai pawh a beisei awm a ni.

Vangchhia-a 'Khaw Hmun Hlui' hian ngaihtuahna a ti kal thui duh kher mai a. Mizoram hi lo luah hmasatu an awm a ni ti fak thei lo mah ila, an lo awm em ni chu tih thei a ni. Kan pi leh pute hun aâng Mizo khaw sak phung kan thlir chuan helai hmun nen hian danglamna riau a awm a. An inhmun hlui te hi Mizo in sak dan, a chhuat kang ang taka sak a nih hmel a. Chu bakah, tuna khaw hmun hlui an hai fai chin khi a zâu tawh khawp mai a, la hai fai belh zel an tum ni pawhin a lang a.

Tuna a khaw hmun hlui hmuh theih chin a pawh khi tun ai khian a la zau zawk dawn niin a hriat a. Chutiang a nih chuan kan pi leh pute kha hnam hrang hrang a hlawma cheng thliah thliah an nih avângin khaw lian tak din a harsa a. Kan pi pute hun a khaw lian ber kan sawi theih chu Selesih Sangsarih kha a ni mai a. Chuvângin, tuna khaw hmun hlui an tih, khaw lian leh mihring pawh tam tak awmna ni tura ngaih khi kan pi leh pute khaw lo dinna, an chenna hlui a ni ang em tih chu sawi mai har tak a ni.

A eng a pawh chu lo ni se la, Mizoram ngei-a thil hlui chhui chian a, zir chian tham kan nei hi kan vannei a. Vangchhe khua-a an hmun hlui kawlte lo fan puitu an khaw pa chhuanawm tak pakhat Pu KC. Doliana'n a sawi âng deuhvin kan history pawh hi a la inthlak daih lo ang tih pawh a sawi theih loh a ni.

DAMLO

■ Pi Rosangi w/o H. Thantluanga (L), V-Sec. chu LRM Hospital atangin Ebenezer Hospital ICU ah sawn a ni.

■ Tv. C. Lalduphpuia s/o C. Lalthankima, T-Sec. chu ZMC & H-ah enkawl mek a ni.

■ Pu B. Zonunmawia s/o B. Lalchuansanga, T-Sec. chu Synod Hospital, Durtlangah zai a ni a, in lama inenkawl zui turin a lo chhuak.

■ Pi C. Zothankhumi w/o LH Thanga, V-Sec. chu Greenwood Hospital atangin a lo chhuak leh ta.

■ Pi Lalrinpuui w/o G. Zasiama, T-Sec. chhungkaw chhiat tawhna thil a Vairengtea a zin chu dam takin a lo haw.

■ Pi Thangtuali w/o R. Thangmawia V-Sec. chu taksa chak loh avangin Synod Hospital, Durtlangah enkawl mek a ni.

■ Pi Noel Zothanpuui w/o David Lalrinzuala, V-Sec. chu naupai lamah harsatna a neih deuh avangin Synod Hospital, Durtlangah enkawl mek a ni.

■ Pu Vanrotluanga, C-Sec. chu a rawngbawl lai tel sa in a intih per palh a, in lamah enkawl mek a ni.

■ Ramnghahmawia s/o Lalramchhana, K-Sec. chu Civil Hospital, Aizawlah enkawl mek a ni.

SUB.COMT THU THAR

■ **Property Sub-Committee :** Ni 16.4.2025 zan khan Local Council ten YMA Inverter an pek chu Committee Room-ah fit in an hnatlang. Vawin ni 19.4.2025 hian Library Roomah light fit in an hnatlang leh baw.

Tin, hun remchangah hmasa berah Tlangauna Mic. te siam tha in hnatlan an tum baw a ni.

■ **Library Sub Committee:** May thla atangin Library hawn tan tum a ni a, Filter thar an nei a, Pu Marina, ECM chuan tlawm takin a lo pe a, a chungah lawmthu an sawi e.

Membership fee hi chhungkaw khat tan kum khatah Rs. 100 a ni dawn a ni.

Vawin Library Room-ah hnatlang pui an nei a, member an thawk chhuak tha hle.

ZIN & HAW

■ Pi B. Sangpuui w/o Er. C. Lalthumhima, S-Sec. chu inentir turin ah Vellore a kal

■ Pu Er. R. Rohminglana, T-Sec. te pafa chu Guwahati-ah an zin.

■ Pu Singlana, C-Sec. chhungkaw thila Leithum leh Champhai a zin chu dam takin a lo haw leh ta.

■ Pi B. Lalrinawmi d/o Pu B. Zakamlova, V-Sec. chu inentir turin NEIGRIHMS Shillong-ah a fapa nen an zin.

■ Pu Vanlalnunpuia Varte, C-Sec. chu a hna thawhna hmun Bungtlang South atangin a lo haw.

■ Pu K. Lalnunmawia, C-Sec. chu a hna thawhna hmun Mamit atangin a lo haw.

KEIMAHNI

■ Dr. Lallianpuui (Mate Lalliani) chuan MARYMA te thingpui inna tur minrawn pe leh ta rup mai. Kan va han lawm tak em. Khamkhawk saisu ang zarin lo vulin, lo chuai lo zel rawh se.

■ Branch hruiute min phalsak ta baw a, Internet Connection thar kan nei ve ta. Grace Home lamin a thlun man min tlawm duai baw. An chungah lawmthu kan sawi takzet e.

■ Chanchinbu man la pe lo ten kan agent te hnenah a pek theih reng e. Tin, chanchinbu dawng lo kan awm a nih chuan kan Manager Pu C. Lallianzuala (9862365843) hnenah kan in hriattir dawn a ni.

LAWMAWM

■ Pi Nuhliri Ralte w/o Lalnunzauva, S-Sec. chu Superintendent-ah a kaisang, CE Highways, PWD-ah a awm ang.

■ Dr. Lallianpuui d/o Thangngovi, C-Sec. Tata Institute of Social Sciences atangin Ph. D 2023 a hmu a. Ph.D title hi “*Mizo Modernity: Transnational Broadcasting, City-Centric Newspapers and Neighbourhood Newscape*” a ni a. 2024 atangin Post-Doctoral Research fellow hna Darmstadt University of Applied Sciences, Germany-ah a thawk. Digital / Platform Media lam a bihchiang a. Tin, Master programme/course, Media, Technology and Society (MTS), Media Faculty, Darmstadt University of Applied Sciences-ah baw a zirtir. Post-doctoral research project ah hian Aizawl digital media lam a en/ zirchiang/ research. Thawhlehi-ah hian Germany hi a pan leh dawn a ni.

THILDANG

■ **Insawn:** Dr. K. Lalbiakchhunga, N-Sec. chu a hna thawhna Kolkata atangin New Delhi-ah sawn a ni.

■ **JAC :** Ramhlun North Joint Action Committee 2024-2025 hruiute insiam rem a ni.

Chairman: Pu K. Lalmawizuala

Vice Chairman: Dr. Joseph Lalhminglana

General Secretary: Lalrampana

Secretaries:-

Tv. Lalthanchhunga T-Sec. 977403510

Pu Zonunmawia T-Sec. 7085847386

Pu R. Lalrinlana V-Sec. 894214711

Pu Lalremsanga N-Sec.-Sec. 9774414628

Pu Lalfakzuala N-Sec. 9612465897

Pu H. Lalremruata - K-Sec. -9077508512

Pu K. Vungmanga S-Sec. 9426192514

■ **Basketball:** Inrinni apiangin chawhnu dar 1:00-3:00 thleng Basketball Free Coaching RSC Field-ah Pu Michael F. Lalawmpuia (Ph: 8014163196) hmalakna in neih thin a ni a. Kum bithlaih a awm lova, a duh apiang tan zawm theih a ni e.

■ **Zangena Petrol Pump Area Welfare:** Pu F. Laltanpuia (Pu Tpa) In bula Electric ban, tluk hlauhawm chu vawin khan hnatlangin an phun tha.

SECTION THU THAR

■ **Saizahawla Section:** An Bench leh Cushion insei hleih te an siamthat tir mek a ni.

Tin, ni 22.04.2025 (Thawhlehi) zan dar 7:00 hian Chawngbawla Runah an committee dawn a, committee member te remchang lo insiam turin an innge e.

■ **Vanapa Section:** Ni 22.04.2025 (Thawhlehi) zan dar 7:00 hian Khuangchera Inah an committee dawn a, committee member te remchang lo insiam turin an innge e.

■ **Khuangchera Section:** Ni 22.04.2025 (Thawhlehi) zan dar 7:00 hian Run Mawiah an committee dawn a, committee member te remchang lo insiam turin an innge e.

■ **Neuva Section:** Ni 22.04.2025 (Thawhlehi) zan dar 7:00 hian YMA Committee Room-ah an committee dawn a, committee member te remchang lo insiam turin an innge e.

EXPERIENCED TUTOR OFFERING TUITION FOR CLASS 1 TO 8

Hna avanga nu leh paten fate lehkha zirpui hman lo emaw tuition kal tir duh chuan; a hnuai a mi ang hian ka lo zirpui thei e.

Class 1-5 : Subject zawng zawng

Class 6-8 : English, Grammar, Mathematics, Science, and Social Studies/Science.

Please Contact - 9862774402



TUI HNA HUMHALH

- Vanmalsawmhlui

IV Semester

Department of Environmental Science

Pachhunga University College

Tui hi nunna nei tawh phawt tan chuan kan nunna hnar pakhat leh kan nunna atana pawimawh tak a ni a. Kan dam khaw chhuah nan mai bakah taksa hriselna atan leh kan nitin nuna kan mamawh langsar ber a ni. Tui kan tlak chham chuan kan chet velna ah harsatna min thlen a. Kan khawsakna kawnga kan mamawh ang bawkin kan taksa in a mamawh bawk a. Taksa in a mamawh tawk tui a hmuh loh chuan kan chak lo a natna in min tlak buak mai thin.

Mi thiamte chuan khawvelah tui hi 71% vel awm an ti a. Chung zingah chuan mihring te in atana tha tawk (fresh water) hi 3% vel niin chumi a tam zawk 79% chu vur tlang ah te hian an awm a, mihringin kan hman theih (liquid) chu 1% vel chauh a awm. Tui hu vana chho (evaporation) a tam hian chhumah insiamin a awm khawn a, ruahtui leh vur ang te in a lo tla ve leh a, chu ruahtui lo tla chu lei hnuaia insiamin a lo put chhuak ta thin a tui hna tha tak kan lo neih phah ta thin a ni. Khuenu in tui hna tha tak min duan sak mahse tui kan tla chham ta fo mai.

Engvangan nge tui kan tlakchham?

Mihring kan pun zel avangin tui mamawhna pawh a sang ve zel a, tui hna ti bawlhhlawh thei kawngah mihring chet velna a tam chho zel bawk. Chungah chuan ramngaw vah chereu vanga tui hna kang te, bawlhhlawh paih mumal loh leh kan thli luan kawr that tawk loh vanga lui dung tawp ta te hi an langsar hle. Kan bawlhhlawh leh thli luan kawr mumal lo hian kan lui tui a tih tawp mai bakah lei hnua lama tui awm (ground water) te thlengin a khawih buai thei a ni. Tui tel loa kan nun theih loh dan tur hrechiantu theuh kan nih ang aian tui leh tui hna humhalh leh thianghligna kawngah hma kan sawn mawh hle. Kan inzirtir na te kan pawm lo nge vei na chang kan hre lo ni dawn ni!

Tui hna humhalh mai bakah kan tui hman tih tlem hi kan tih tur pakhat a ni. Thei leh thlai kan silna thli pangpar leh kan thil chin pek mai te, tui herh haw na herh phui that te, septic tank leh tui pipe phui lo leh put a awm em tih ngaihven fo te, tui tam lai pawha renchem taka hman thiam leh ruah tui lo khawl ve te hi kan tih thei thil harsa tak ni lem lo an ni. Tui hna kan tih chereu bakah kan bawlhhlawh paih dan leh kan thli luan kawr mumal lo kan namnulh chuan kan tui tlan a thianghligna thei lo. Tui tih thianghligna atan damdawi te hmangan khawlin tih fai theih ni bawk mahse khawl thil chu chhe thei a ni a, chemical thil lah taksa tan a tha lo chin a awm theih bawk avangin faina kawngah pawh hmasawn kan ngai hle a ni.

Thing leh mau te hi tui hna ti thatu an nih miao avangin tui hna kan humhalh dawn chuan ramngaw te hi kan humhalh tel ve ngei a ngai a ni. Mizo te hi lo nei mi kan nih angin ramngaw kan tih chereu na langsar ber chu lo hal hi a ni a. Kan fimkhur tawk loh avangin kan duh bak thlengin a kang kai a, mei si thliin a len per te avangin kan tum vang ni lo in ram a kang hluah mai thin. Heng kan lo hal te hian tui hna tha tak a ti kang ta mai thin a ni. Changkanna leh hmasawn duhna avanga kawngpui sialte pawh hian ramngaw a ti chereu nasa hle awm e. Heng te avang hian tui hna a a kang a, kan tui tlan ber te a tlemin kan tuikhur ah pawh tui tam lai a awm khat ta hle a, tuikhur a tui awm lo hmuh tur a tam ta hle bawk. Kan mamawh tam ber hi ramngaw atanga kan neih te a nih avangin leilung leh leilunga thil lo thang zawng zawngte dimdawi leh humhim hi kan tih tur a ni. Kan mamawh tih tlem leh a daihzai zawka hman dan kan zir a pawimawh hle.

Tun atanga tui tlak chham kan tawn fo chuan kan tui hna a tlem telh telh ang a, tui tlan tur mumal kan nei lo mai dawn tih kan hrethiam tlang awm e. Kan tui tlan ti bawlhhlawh leh ti chereu theitu chu tui mamawh bertu mihring te hi kan ni. Kan humhalhna kawngah kan chetna te chawp leh chilhin a lang nghal kher lo thei a. Theihtawpa kan humhalh tlat erawh chuan a chhawr tur chu tu dang ni loin keimahni bawk hi kan ni.

Tui leh tui hna humhalhna kawngah nasa zawkin hma kan la ve thei lo pawh a ni thei e, mitinin awlsam taka hmasawwna kan neih theih dan erawh a awm. Tui renchem zawka hman leh bawlhhlawh mumal taka paih hi a ni. Heng thil pahni i tih avang hian veng chhung leh ram tan thil ropui leh hlu tak i ti a hmasawwna kawnga ke i pen tih hria in, kan chhenna tur neih chhun Mizoram tan tui hna humhalh kawngah hmasawn tumin tan i la thar leh theuh ang u. Ka lawm e.



ADVERTISEMENT

KC TUI

(10-8)

Tui thianghlign, PickUp-in 2,000 litre kan pe thei reng e. Ramhlun North veng chhung tan discount kan pe e.

Ph: 7005010327 / 9774223462

SP TUI

(4-1)

Tui hna thianghlign, ei leh in tlak, litre 2000 pickup trip kan pe thei e.

Mobile: 9615789047/8730960917

M.S. SEPTIC TANK SERVICE

(5-3)

Septic Tank khat paih fai, commode Block, Pipe Block leh Soak pit hlui leh a thar siam repairing engkim kan thawk reng e.

Rate: Inbiakremna | Ph: 8974361224 | 7005241029

SEPTIC TANK Khat & REPAIR

Septic tank khat paih leh repair kan ti thei reng a, rate chu inbiakremna a ni ang.

Contact: 9612376373 | C/o Marina: 9436140530

(5-3)

ISAK SEPTIC TANK SERVICE

(5-3)

Septic tank khat paih fai, Comode Block, Soak pit, Pipe Fitting Repare engkim, khur chhung lut in, A neitu te Lungawi na thlap in kan thawk thin e.

Ph. 9862344971, Bawngkawn south

SAWMA SEPTIC TANK SERVICE

Septic Tank khat paih fai, commode block, pipe fit, soak pit thar siam engkim kan ti thei e.

Rate: Inbiakremna

Ph: 8119969364

(5-3)

LM SEPTIC TANK SERVICE

Septic Tank paih fai leh repairing engkim kan khawih thei e.

Kum 17 chuang experience nei kan ni e

Rate Rs. 4000 per trip

Ph: 6909183193

(5-3)

PJ Security Solution

(3-2)

Mimal, Dawr, School leh Office-ah tlawm takin CCTV (Security Camera) kan fit sak thei reng e. Kum tam tak experience nei tawh kan ni a, Servicing ah buaina a awm lovang.

Lalpekhlua, Tuivamit Ph: 9774163016/ 6009033303

JM SEPTIC TANK SEVICE

Septic tank khat paih fai, comode block, pipe fit, soak pit tha lo leh a thar pawh kan siam thei reng e. Kan sulhnu a felfai a, service hlun leh rintlak kan ni e.

Rate inbiak remna.

Registration: MRS 542

Contact: 9862476439 / 9436199884

(5-1)

ST. STEPHEN'S SCHOOL

RAMHLUN 'N', AIZAWL

ADMISSIONS HS & HSS (Arts & Sc)

Zirtirtu tha tak te enkawlina *Zirlaite hma thlir neihpuina *Zirlaibu piah lam nunphung zirtirna

FREE ADMISSION FOR CL-IX (9774632726/ 9436353625)